

**“Olmaliq KMK” AJ monopoliyaga
qarshi kurashish bo‘yicha komplaens-
nazorat tizimini joriy qilish va uning
ishlash tartibi to‘g‘risidagi”
NIZOM**

1-bob. Umumiy qoidalar

1. Ushbu Nizom “Olmaliq KMK” AJ ijro apparati hamda tarkibidagi bo‘linmalarda monopoliyaga qarshi komplaens nazorat tizimini joriy etish, uning faoliyat yuritish va monitoring qilish tartibini belgilaydi.

2. Mazkur Nizomda quyidagi asosiy tushunchalardan foydalanilgan:

monopoliyaga qarshi kurashish organi — O‘zbekiston Respublikasi Monopoliyaga qarshi kurashish qo‘mitasi va uning hududiy boshqarmalari;

monopoliyaga qarshi komplaens nazorat — faoliyatning raqobat to‘g‘risidagi qonunchilik hujjatlariga muvofiqligini ta‘minlash, huquqbuzarliklar xavfini baholash va ularning oldini olishga qaratilgan ichki tashkiliy chora-tadbirlar va tartib-taomillar tizimi;

monopoliyaga qarshi komplaens nazorat to‘g‘risidagi hisobot — raqobat to‘g‘risidagi qonunchilik hujjatlariga amal qilinishini tashkil etish va uning natijalari haqidagi axborotni o‘z ichiga oladigan hujjat yoxud hujjatlar yig‘indisi;

vakolatli shaxs (biriktirilgan xodim yoxud ichki nazorat tuzilmasi xodimi) — Komplaens-nazorat xizmati (keyingi o‘rinlarda – Xizmat);

savdolar — tovar va xizmatlarni xarid qilish va sotish bilan bog‘liq bo‘lgan tartib-taomillar, shu jumladan, elektron savdo taomillari.

3. Quyidagilar “Olmaliq KMK” AJda monopoliyaga qarshi komplaens-nazorat tizimining asosiy vazifalari hisoblanadi:

raqobat to‘g‘risidagi qonunchilik hujjatlari talablarining ehtimoliy buzilish xavflarini aniqlash, baholash hamda ularni boshqarish;

“Olmaliq KMK” AJda raqobat to‘g‘risidagi qonunchilik hujjatlari talablariga muvofiqlikni ta‘minlash, monitoring va nazorat qilish;

“Olmaliq KMK” AJning faoliyatida raqobat to‘g‘risidagi qonunchilik hujjatlari talablari buzilishining hamda mansabdor shaxslar (rahbarlar) tomonidan o‘z vazifalarini bajarish jarayonida raqobatga zid xatti-harakatlar amalga oshirilishining oldini olish;

“Olmaliq KMK” AJda monopoliyaga qarshi komplaens-nazorat tizimining ishlash samaradorligini baholash va ta‘minlash;

“Olmaliq KMK” AJ xodimlarining ish faoliyatida raqobat to‘g‘risidagi qonunchilik hujjatlari talablari buzilishining oldini olish maqsadida, xodimlarni ushbu yo‘nalish bo‘yicha muntazam ravishda o‘qitish, bilim va malakalarini oshirish, ularda raqobat to‘g‘risidagi qonunchilik hujjatlariga doir bilim va ko‘nikmalarni rivojlantirish.

2-bob. Kombinat ijro apparati hamda tarkibiy bo‘linmalarda monopoliyaga qarshi komplaens-nazorat tizimini tashkil etish

4. Kombinat ijro apparati hamda tarkibiy bo‘linmalarda monopoliyaga qarshi komplaens nazorat tizimini joriy etish va takomillashtirish bo‘yicha Komplaens-

nazorat xizmati quyidagi ishlarni amalga oshiradi:

raqobat to'g'risidagi qonunchilik hujjatlari talablari buzilishini monitoring qilish;

faoliyatga tegishli materiallarni tahlil qilish (shu jumladan, raqobatni va (yoki) iste'molchilarning huquq va manfaatlarini cheklaydigan normalarni aniqlashga qaratilgan ichki normativ hujjatlarni xatlovdan o'tkazish), aniqlangan kamchiliklarni bartaraf etishga yo'naltirilgan chora-tadbirlarni ishlab chiqish;

raqobatni cheklashga olib kelishi mumkin bo'lgan omillarni, xavf-xatarlarni aniqlash va ularni bartaraf etish bo'yicha taklif va tavsiyalar ishlab chiqish;

monopoliyaga qarshi komplaens-nazorat tizimining faoliyat yuritishi bilan bog'liq masalalar bo'yicha Kombinat ijro apparati bo'linmalari hamda tizimdagi korxonalar faoliyatini muvofiqlashtirish;

raqobat to'g'risidagi qonunchilik hujjatlari talablari buzilganligi faktlari bo'yicha ichki o'rganish va xizmat tekshiruvlarini tashkil etish;

monopoliyaga qarshi kurashish organi bilan raqobat to'g'risidagi qonunchilik hujjatlari talablari buzilishi bo'yicha o'zaro axborot almashish;

raqobat to'g'risidagi qonunchilik hujjatlari talablarining buzilish xavflarini kamaytirish maqsadida bir yilga mo'ljallangan "Yo'l xaritasi"ni ishlab chiqish ishlarini muvofiqlashtirish va amalga oshirilishini nazorat qilish;

raqobat to'g'risidagi qonunchilik hujjatlari o'zgarishlarni monitoring qilish, shuningdek, Kombinatning ichki normativ hujjatlariga tegishli o'zgartish va qo'shimchalar kiritish yuzasidan takliflar kiritish;

Kombinat ijro apparati bo'linmalarida hamda tarkibiy korxonalarda raqobat to'g'risidagi qonunchilik hujjatlari talablarini buzish xavf-xatarlarini aniqlash va baholash ishlarini tashkillashtirish, muvofiqlashtirish, xavf-xatarlar bilan bog'liq holatlar hisobini (reestrini) yuritish ishlariga umumiy rahbarlikni amalga oshirish, yuzaga kelishi ehtimollarini baholash ishlarini tashkillashtirish;

Kombinat ijro apparati bo'linmalari hamda tarkibiy korxonalar tomonidan ularning faoliyatida raqobatni cheklashga olib kelishi mumkin bo'lgan manfaatlar to'qnashuvini aniqlash, baholash hamda ularni bartaraf etish bo'yicha ishlab chiqilgan takliflarni umumlashtirish;

"Olmaliq KMK" AJ xodimlariga raqobat to'g'risidagi qonunchilik hujjatlari talablariga amal qilish bilan bog'liq masalalar bo'yicha maslahatlar berish;

Xodimlar bilan ishlash xizmati hamda boshqa manfaatdor bo'linma va tuzilmalarga Kombinat xodimlarini monopoliyaga qarshi komplaens-nazorat masalalari bo'yicha muntazam ravishda treninglar, seminarlar, vebinarlar va boshqa shakldagi o'qitish va malaka oshirish tadbirlarini o'tkazish ishlarida yordam berish;

"Olmaliq KMK" AJ tomonidan qabul qilinadigan ichki normativ hujjatlarning

loyihalarini o'rganish va raqobat to'g'risidagi qonunchilik hujjatlari talablarining buzilishini keltirib chiqarishi mumkin bo'lgan normalar aniqlangan taqdirda, bu haqda Boshqaruv raisiga takliflar kiritish;

“Olmaliq KMK” AJ ijro apparati bo'linmalari hamda tarkibiy korxonalar tomonidan monopoliyaga qarshi komplaens nazorat tizimining joriy etilishi va samarali faoliyat ko'rsatishini tashkil etish;

yil yakuni bilan birinchi fevralga qadar monopoliyaga qarshi komplaens-nazorat tizimining holati haqidagi hisobotni Boshqaruv raisiga tasdiqlash uchun taqdim etish.

5. Komplaens-nazorat xizmati o'z faoliyatini amalga oshirishda bevosita va to'g'ridan-to'g'ri Boshqaruv raisiga bo'ysunadi va faqat unga hisobdor bo'ladi.

6. Xizmatga hamda uning xodimlariga ushbu Nizom va boshqa qonunchilik hujjatlarida nazarda tutilmagan vazifa, funktsiya va topshiriqlar yuklatilishiga yo'l qo'yilmaydi.

3-bob. Raqobat to'g'risidagi qonunchilik hujjatlari talablarining buzilish holatlarini aniqlash

7. “Olmaliq KMK” AJda raqobat to'g'risidagi qonunchilik hujjatlari talablarining buzilish xavf-xatarlarini aniqlash maqsadida, Kombinatning mutasaddi bo'linmalari bilan birgalikda Komplaens-nazorat xizmati tomonidan quyidagilar amalga oshiriladi:

Kombinatda raqobat to'g'risidagi qonunchilik hujjatlari talablarining buzilishiga yoxud raqobatni cheklashga olib keladigan normalar va qoidalarni aniqlash maqsadida, Kombinatning ichki normativ hujjatlarini o'rganish ishlarini tashkillashtirish, yalpi xatlovdan o'tkazish to'g'risida Boshqaruv raisiga takliflar kiritish;

davlat xaridlariga (tenderlar, tanlovlar hamda birja savdolari) nisbatan qo'yiladigan monopoliyaga qarshi talablarga amal qilinishini, shuningdek raqobat to'g'risidagi qonunchilik hujjatlari talablariga muvofiqligini tahlil qilish ishlarini muvofiqlashtirish;

aniqlangan raqobat to'g'risidagi qonunchilik hujjatlari talablarini buzish holatlarini tahlil qilish ishlarini muvofiqlashtirish;

raqobat to'g'risidagi qonunchilik hujjatlarini qo'llash amaliyotini monitoring va tahlil qilish ishlarini muvofiqlashtirish;

raqobat to'g'risidagi qonunchilik hujjatlari talablarining buzilish xavf-xatarlarini kamaytirish bo'yicha ishlab chiqilgan va amalga oshirilayotgan chora-tadbirlar samaradorligini muntazam ravishda baholash ishlarida ishtirok etish;

Kombinat faoliyatida vujudga kelish ehtimoli yuqori bo'lgan monopoliyaga qarshi xavf-xatarlarni tahlil qilish va ularning ro'yxatini xatarlar xaritasi shaklida tuzish ishlariga umumiy rahbarlik qilish hamda Kombinat bo'linmalari va korxonalarining bu boradagi ishlarini muvofiqlashtirish;

raqobat to'g'risidagi qonunchilik hujjatlari talablarining buzilish xavflarini kamaytirish bo'yicha ishlab chiqilgan va amalga oshirilayotgan tadbirlarning samaradorligini muntazam ravishda baholash ishlarini tashkillashtirish va nazorat qilish;

“Olmaliq KMK” AJning faoliyati xususiyatidan kelib chiqib hamda Boshqaruv raisi bilan kelishilgan holda monopoliyaga qarshi komplaens-nazorat tizimining samarali ishlashini ta'minlash va takomillashtirishga qaratilgan boshqa chora-tadbirlarni amalga oshiradi;

Raqobat to'g'risidagi qonunchilik hujjatlari talablarining buzilishi bo'yicha aniqlanadigan xavf-xatarlar Kombinatning tegishli bo'linma va korxonalari tomonidan mazkur Nizomning ilovasiga muvofiq darajalar bo'yicha malakalanadi.

8. Raqobat to'g'risidagi qonunchilik hujjatlari talablarining buzilish xavf-xatarlarini tahlil qilish, aniqlash va baholash to'g'risidagi tegishli bo'linma va korxonalarining hisobot va axborotlari monopoliyaga qarshi komplaens-nazorat haqidagi Kombinatning jamlanma (umumlashtirilgan) hisoboti Xizmat tomonidan ishlab chiqiladi.

4-bob. Kombinat ijro apparati bo'linmalari hamda tarkibiy korxonalarda Monopoliyaga qarshi komplaens-nazorat tizimining ishlash samaradorligini baholash

9. “Olmaliq KMK” AJda monopoliyaga qarshi komplaens-nazorat tizimining ishlash samaradorligini baholash bo'yicha asosiy ko'rsatkichlarni hisoblash monopoliyaga qarshi kurashish qo'mitasi tomonidan ishlab chiqilgan qo'llanma (metodika) asosida Kombinatning Ishchi guruhi tomonidan amalga oshiriladi.

10. “Olmaliq KMK” AJ ijro apparati bo'linmalari hamda tarkibiy korxonalarida monopoliyaga qarshi komplaens-nazorat tizimini joriy etish holati hamda erishilgan asosiy samaradorlik ko'rsatkichlari har bir bo'linma va korxonalar tomonidan tegishli qismida baholanadi hamda umumlashtirish va Kombinatning jamlanma hisobotini tayyorlash uchun Xizmatga taqdim qilinadi (yil yakuni bo'yicha bir marotaba fevral oyining birinchi sanasiga qadar).

11. “Olmaliq KMK” AJda monopoliyaga qarshi komplaens-nazorat tizimining ishlash samaradorligini baholash bo'yicha asosiy ko'rsatkichlarga erishilgani to'g'risidagi tegishli bo'linmalar hamda korxonalar tomonidan tayyorlangan hisobotlar, tasdiqlovchi hujjatlari bilan birgalikda Komplaens-nazorat xizmatiga Kombinatning jamlanma (umumlashtirilgan) hisobotini tayyorlash uchun taqdim qilinadi.

5-bob. Kombinat ijro apparati bo'linmalari hamda tarkibiy korxonalarining Monopoliyaga qarshi komplaens-nazorat haqidagi hisoboti

12. Kombinat ijro apparati bo'linmalari hamda tarkibiy korxonalarining Monopoliyaga qarshi komplaens-nazorat haqidagi hisobotlari quyidagi ma'lumot va axborotlarni o'zida aks ettirishi lozim:

raqobat to'g'risidagi hamda monopoliyaga qarshi qonunchilik hujjatlari

talablarining buzilish xavf-xatarlari bo'yicha o'tkazilgan baholash ishlarining natijalari hamda aniqlangan xavf-xatarlar ta'sirini kamaytirish bo'yicha chora-tadbirlarning bajarilishi;

monopoliyaga qarshi komplaens-nazorat tizimining asosiy samaradorlik ko'rsatkichlariga erishganlik holati haqidagi dolzarb va ishonchli axborot.

13. Boshqaruv raisi tomonidan tasdiqlangan monopoliyaga qarshi komplaens-nazorat tizimi holati bo'yicha umumiy ma'lumotlardan iborat bo'lgan hisobot Kombinatning internet tarmog'idagi rasmiy veb-saytida Axborot xizmati tomonidan joylashtiriladi hamda besh ish kuni mobaynida monopoliyaga qarshi kurashish qo'mitasiga yuboriladi.

6-bob. Yakuniy qoidalar

14. Ushbu Nizom O'zbekiston Respublikasining korrupsiyaga qarshi kurashish sohasidagi qonunchilik hujjatlariga, raqobat to'g'risidagi, monopoliyaga qarshi kurashish sohasidagi qonunchilik hujjatlariga, yoxud Kombinatning ichki normativ hujjatlariga bevosita ta'sir etuvchi o'zgartish va qo'shimchalar kiritilgan taqdirda, shuningdek ilg'or xalqaro amaliyot o'zgarganda zaruratga ko'ra qayta ko'rib chiqilishi mumkin.

Kombinatning Komplaens-nazorat xizmati mazkur Nizomga o'zgartish va qo'shimchalar kiritish uchun mas'ul bo'linma hisoblanadi.

15. Kombinatda ishlovchi barcha xodimlar, ularning egallab turgan mansab/xizmat lavozimi, ish staji yoxud boshqa omillaridan qat'iy nazar ushbu Nizomning qoida va talablariga og'ishmay rioya qilish uchun mas'ul hisoblanadilar.